

ԳՆԱՀԱՏՄԱՆ ՄԵԹՈԴԱԲԱՆՈՒԹՅՈՒՆ ՆԱԽԱԲԱՆ

Մեթոդաբանությունը բնութագրում է.

- գնահատման հիմնական նպատակները, խնդիրները, սկզբունքները և գործառույթները,
- սովորողների ուսումնական գործունեության ընթացքի և արդյունքների գնահատումը կարգավորող սկզբունքները, մոտեցումները, մեթոդները,
- գնահատման տեսակները և ստուգման ձևերը:

Նպատակը

Ուսումնառության արդյունքների գնահատման նպատակն է՝ որոշել սովորողի կարողունակությունների զարգացման աստիճանը՝ ըստ ուսումնական առարկաների չափորոշիչներով և ծրագրերով սահմանված վերջնարդյունքներին համապատասխան ձեռք բերած գիտելիքների, հմտությունների, դիրքորոշումների ու արժեքների ձևավորման աստիճանի:

Խնդիրները

- գնահատման տարբեր ձևերի և տեսակների համակարգված կիրառման միջոցով հնարավորություն տալ սովորողներին առավելագույնս ցուցաբերել իրենց գիտելիքները, կարողությունները և հմտությունները,
- գնահատման չափանիշների հստակեցման միջոցով բարելավել ուսուցման գործընթացի արդյունավետությունը,
- ձևավորող գնահատման կանոնակարգման շնորհիվ ավելացնել սովորողների հետաքրքրությունն ուսուցանվող առարկաների նկատմամբ և բարձրացնել ուսումնառության արդյունավետությունը,
- խթանել սովորողի ինքնաճանաչման, ինքնազարգացման և ինքնագնահատման կարողությունների զարգացումը, նպաստել նրա անձնային որակների և դիրքորոշումների ձևավորմանը,
- բարձրացնել ուսուցիչների պատասխանատվության և մասնագիտական պատրաստվածության աստիճանը:

Գնահատումը միտված է յուրաքանչյուր սովորողի ուսումնական գործունեության խթանմանը, ուսուցման և ուսումնառության վերահսկմանը, բարելավմանը և շարունակական զարգացմանը:

Գնահատման գործընթացի հիմքում ընկած են **հուսալիության, հավաստիության, մատչելիության, օբյեկտիվության, արդարության և թափանցիկության** սկզբունքները:

Սկզբունքները

Հուսալիություն

Հուսալիությունը ստուգման գրանցված արդյունքի հարաբերական կայունությունն է: Գնահատումը համարվում է հուսալի, եթե տարբեր ժամանակներում անցկացված ստուգման արդյունքները գրեթե նույնն են նույն խմբին, անձին նույն թեստով ստուգելու դեպքում: Օրինակ՝ եթե ձեր ժամացույցը 5 րոպե առաջ է ցույց տալիս իրական ժամից, սակայն, ամեն անգամ ժամը ճշտելիս դուք գիտեք, որ այն ժամը սխալ է ցույց տալիս, բայց սխալը հարաբերական կայուն է, այսինքն՝ միշտ 5 րոպե է առաջ, ապա ձեր ժամացույցը հուսալի է, բայց ոչ ճշգրիտ: Նույն երևույթը դիտարկենք դպրոցական գնահատման համատեքստում: Դուք գնահատումն իրականացնում եք սովորողների միջև համեմատական սկզբունքով: Եթե տվյալ սովորողին

նշանակում եք 4 միավոր, ինչ-ինչ պատճառներով ավելի ցածր չեք ուզում նշանակել, մյուս երեխաներին գնահատում եք՝ առաջնորդվելով նախորդի 4 միավորի համեմատությամբ: Նման գնահատումը կարելի է համարել հուսալի, բայց ոչ հավաստի:

Հավաստիություն

Գնահատման հավաստիությունը (վավերականությունը) ցույց է տալիս գնահատման ճշգրտությունը, թե որքանով է գնահատումը համապատասխանում հստակ մշակված չափանիշներին և ցույց է տալիս գնահատվողի իրական կարողունակությունները: Գնահատման հավաստիությունը նաև մեծապես կախված է գնահատման նպատակից և ընտրված գործիքից: Օրինակ, փորձենք պատկերացնել կշեռք, որը ամեն անգամ ձեր կշիռը ցույց է տալիս X կգ, և այն համապատասխանում է իրականությանը, քանի որ դուք հենց կշռում եք X կգ: Այս տվյալը կարելի է համարել հավաստի, քանի որ այն համապատասխանում է իրականությանը և ճշգրիտ է: Այս օրինակից կարելի է եզրակացնել, որ գնահատումը միշտ պետք է ձգտի հավաստիության:

Փորձենք դիտարկել նախորդ սկզբունքի օրինակով. եթե 4 միավոր ստացող սովորողին գնահատեիք՝ պահպանելով հավաստիության սկզբունքը, ապա նա և մյուս սովորողները, հավանաբար, հավասարապես կստանային ավելի ցածր միավորներ: Նման գնահատումը կլինի հավաստի, քանի որ կարտահայտի սովորողների գիտելիքների և հմտությունների գործող չափանիշներին համապատասխանությունը: Եթե ստուգման արդյունքը հավաստի է, այն գրեթե միշտ հուսալի է: Հավաստի գնահատումը գրեթե միշտ հուսալի է, սակայն հուսալին միշտ չէ, որ հավաստի է:

Օբյեկտիվություն

Օբյեկտիվ գնահատումը ստուգման միջոց է, որի դեպքում տրված հարցերն ունեն մեկ ճիշտ պատասխան: Օբյեկտիվ գնահատման ամենատարածված ձևերից են բազմակի ընտրության համապատասխանեցման, լրացման, պնդում և պատճառ, ճիշտ/սխալ պատասխանով առաջադրանքները:

Օբյեկտիվ գնահատումն ունի իր ուրույն նշանակությունը, քանի որ այն կարող է չափել աշակերտի կարողությունների բոլոր մակարդակները՝ հիշողությունից մինչև սինթեզ:

Բացի այդ, օբյեկտիվ գնահատումը չպետք է կախում ունենա գնահատողի սուբյեկտիվ գործոնից և պետք է իրականացվի հստակ չափանիշներին համապատասխան:

Մատչելիություն

Գնահատումը կարելի է համարել մատչելի (հասանելի), երբ կիրառվում են այնպիսի ձևեր և առաջադրանքներ, որոնք համապատասխանում են տվյալ տարիքային և անհատական զարգացման առանձնահատկություններին: Այսինքն՝ ուսումնառության արդյունքների գնահատման համատեքստում մատչելիությունը վերաբերում է սովորողի կարողունակությունները ցուցաբերելու հնարավորության ընձեռնմանը:

Մատչելիությունը կարևոր նախապայման է գնահատման մյուս սկզբունքների ապահովման հարցում: Օրինակ, եթե կոնկրետ տարիքային խմբի համար փորձենք կիրառել փորձաքնված հավաստի և հուսալի գնահատման միջոցներ, սակայն հաշվի չառնենք կրթության առանձնահատուկ պայմանների կարիք ունեցող (լսողական, տեսողական և այլն) սովորողների համար խելամիտ հարմարեցումները, ապա նման գնահատումը չի կարող համարվել մատչելի, հուսալի և հավաստի:

Արդարություն և թափանցիկություն

«Արդարություն» տերմինը սահմանվում է որպես «մարդկանց հետ հավասար կամ ողջամիտ, ինչպես նաև անկողմնակալությամբ և ազնվությամբ վերաբերմունքի որակ»: Այս սահմանումները ենթադրում են, որ գնահատման գործընթացներն արդար են, եթե դրանք զերծ են կողմնակալության տարբեր դրսևորումներից: Գնահատումը կարող է համարվել արդար, եթե այն անհիմն արտոնություն չի տալիս գնահատվող սովորողների որոշակի խմբին:

Պարզ բառերով, արդարությունը «կողմնակալության բացակայությունն է. գնահատման գործընթացում բոլոր սովորողների հանդեպ արդար վերաբերմունքի և նյութը սովորելու հարցում հավասար հնարավորությունների ընձեռումը: Գնահատման ընթացքում կարևոր է ապահովել սովորողի տեղեկացված լինելը. նա պետք է հասկանա և կարողանա մասնակցել գնահատման գործընթացին և համաձայնի, որ գործընթացը տեղին է: Այն նաև ներառում է գնահատվող անձի կողմից գնահատման արդյունքը վիճարկելու և անհրաժեշտության դեպքում վերագնահատվելու հնարավորություն: Արդար և թափանցիկ լինելու պարագայում գնահատումը չպետք է խտրականություն դնի սովորողների միջև, այն պետք է բացառապես հիմնվի բոլորին հավասար հնարավորություններ ապահովելու վրա՝ հաշվի առնելով գնահատվողի կարողությունների մակարդակը:

Գնահատման ընթացքում սովորողի ուսումնական առաջընթացի և դժվարությունների վերաբերյալ հավաքագրված տեղեկատվությունը կարող է հիմք հանդիսանալ սովորողի կրթության առանձնահատուկ պայմանների կարիքը գնահատելու համար:

Գնահատման տեսակները

Ըստ նպատակի՝ կիրառվում է սովորողի ուսումնառության արդյունքների գնահատման երեք տեսակ, որոնք հաջորդում են մեկը մյուսին և կարող են պարբերաբար կրկնվել նշված հաջորդականությամբ.

- 1) հայտորոշիչ (դիագնոստիկ) գնահատում,
- 2) ձևավորող գնահատում,
- 3) ամփոփիչ գնահատում:

Այս հայտորոշիչ-ձևավորող-ամփոփիչ շղթան կարելի է անգամ մեկ դասի ընթացքում անել՝ փոքրիկ փուլի մեջ և այդ փուլերը կարող են կարճատև և երկարատև լինել՝ դասից մինչև ենթաթեմա, թեմա, կիսամյակ կամ տարի (կետ 39): Գնահատման տարբեր տեսակների ժամանակ կիրառվում են բազմազան գործիքներ, ընդ որում՝ միևնույն գործիքը կարող է կիրառվել գնահատման բոլոր տեսակների դեպքում: Կարևոր է, թե ինչ նպատակով է կիրառվում այդ գործիքը և թե ինչպես են օգտագործվելու տվյալ գնահատման արդյունքները:

Հայտորոշում

Ուսուցման գործընթացի հաջողությունը մեծապես պայմանավորված է սովորողի կարողունակության առկա մակարդակի ճիշտ հայտորոշմամբ (դիագնոստիկա):

Հայտորոշիչ գնահատման նպատակն է՝ բացահայտել սովորողների նախնական գիտելիքները, հմտությունները, վերաբերմունքն ու արժեքները ուսումնական գործընթացի որևէ փուլի՝ ուսումնական տարվա, կիսամյակի, նոր թեմայի կամ դասի ուսումնասիրման մեկնարկից առաջ:

Հայտորոշիչ գնահատման արդյունքում պետք է բացահայտվի, թե սովորողն ինչ գիտի, չգիտի, կամ սխալ գիտի ուսուցանվող թեմայի վերաբերյալ, ինչն էլ հնարավորություն է տալիս պլանավորելու ուսուցման և ուսումնառության բովանդակությունը, գործընթացը, ինչպես նաև ընտրելու ուսուցման կազմակերպման արդյունավետ ձևեր, միջոցներ և մեթոդներ:

Հայտորոշիչ գնահատումն իրականացվում է տարբեր ձևերով՝ կախված ուսումնասիրվող առարկայի, թեմայի և սովորողների տարիքային առանձնահատկություններից:

Հայտորոշման համար կարելի է կիրառել որոշ մեթոդներ, որոնք բացահայտում են թեմայի վերաբերյալ սովորողների ֆոնային գիտելիքները, հմտությունները, դիրքորոշումներն ու արժեքները: Օրինակ՝ մտքերի տարափ, քարտեզագրում, փոխներգործուն նշանների համակարգ, ԳՈՒՍ, մտածիր-զույգ կազմիր-կիսվիր, 5-րուպեանոց շարադրանք և այլն:

Հայտորոշիչ գնահատումն իրականացվում է ուսուցչի կողմից, որի արդյունքում միավորային գնահատում չի իրականացվում: Հայտորոշիչ գնահատման համար որոշ դեպքերում կարող են տրվել կողմնորոշիչ բալեր, նիշեր, որոնք չպետք է նույնացվեն 10-միավորային սանդղակի միավորների հետ:

Հայտորոշիչ գնահատման համար կարող են օգտագործվել հետևյալ ձևերը.

- 1) թեստ
- 2) բանավոր հարցում
- 3) բաց հարցերով քննարկում
- 4) գրավոր աշխատանք
- 5) գործնական աշխատանք
- 6) և այլն

Հայտորոշման որոշ ձևերի դեպքում կարելի է կիրառել որոշ մեթոդներ, որոնք առավելապես բացահայտում են թեմայի վերաբերյալ սովորողների ֆոնային գիտելիքները, հմտությունները, դիրքորոշումներն ու արժեքները: Օրինակ՝ մտքերի տարափ, քարտեզագրում, փոխներգործուն նշանների համակարգ, ԳՈՒՍ, մտածիր-զույգ կազմիր-կիսվիր, 5-րուպեանոց շարադրանք և այլն:

Հայտորոշիչ թեստ

Ուսուցիչներն ուսումնական տարվա սկզբում, կամ որևէ ուսումնական փուլ սկսելուց առաջ, սովորողներին հանձնարարում են լրացնել նախնական հայտորոշիչ թեստ, որպեսզի կարողանան ճիշտ պլանավորել սովորողների հետագա ուսուցման և ուսումնառության գործընթացը՝ հաշվի առնելով թեստի արդյունքները: Հայտորոշիչ թեստի հարցերի քանակը կախված է մեկնարկվող թեմատիկ փուլի տևողությունից, որն ուսուցիչը նպատակ ունի հայտորոշել, ձևավորող գնահատում իրականացնել և ամփոփել: Եթե փուլը կարճ է (դաս, ենթաթեմա և այլ), հարցերը և առաջադրանքները կարող են լինել փոքրաթիվ 3-5 առաջադրանք և կարճ ժամանակում կատարելու համար, իսկ երկարատև փուլի համար (թեմա, կիսամյակ, տարի, կրթական աստիճան և այլ) կարող են լինել քանակով ավելի շատ և ավելի երկար ժամանակի համար: Երկարատև փուլի համար անցկացվող հայտորոշիչ թեստի առաջադրանքների քանակը կախված է սովորողների տարիքային խմբի և դասավանդվող թեմայի առանձնահատկություններից, սակայն ժամանակը չպետք է գերազանցի 30 րոպեն:

Հայտորոշիչ թեստի հիմնական հատկորոշիչները, որոնք կազմում են, այսպես կոչված, թեստի «նախագիծը», որոշում են թեստի կառուցվածքն ու բովանդակությունը: Դրանք են՝

- Ո՞ր դասարանի համար է նախատեսված:
- Ի՞նչ կոնկրետ նպատակ է հետապնդում:
- Ո՞ր թեմայի կամ թեմաների վերաբերյալ է կազմված:
- Ո՞ր վերջնարդյունքներն են ստուգվելու:
- Ի՞նչ տիպի առաջադրանքներ են մշակվելու:
- Ի՞նչ բարդության աստիճանի առաջադրանքներ են ներառվելու և ինչ համամասնությամբ:
- Քանի՞ առաջադրանք է ներառվելու:
- Ի՞նչ տիպի առաջադրանքներ են ներառվելու:
- Որքա՞ն ժամանակ է հատկացվելու թեստի լրացմանը:

Հայտորոշիչ թեստի առանձնահատկություններն են՝

1. Ստուգում են սովորողների ընդհանրական, ֆոնային գիտելիքները մեկնարկվող նոր թեմայի, թեմաների վերաբերյալ:
2. Օգտագործվում են տարբեր տիպի առաջադրանքներ՝ փակ և բաց հարցերով, որոնք ենթադրում են մեկ ճիշտ պատասխան պահանջող՝ բազմակի ընտրության, լրացման, հաջորդականության վերականգնման կամ համապատասխանեցման առաջադրանքներ և կարճ պատասխանով առաջադրանքներ:
3. Հարցերը պետք է ձևակերպվեն կարճ, պարզ և մատչելի:
4. Առաջադրանքները պետք է դասավորված լինեն պարզից մինչև բարդության: Հայտորոշիչ թեստերում ցանկալի չէ ներառել բարդ առաջադրանքներ, սակայն կարելի է ստուգել նաև նախատեսվող թեմայի վերաբերյալ երեխայի կարողությունները, ներուժը, իսկ այդ հարցերը կարող են տվյալ փուլի համար բարդ թվալ, քանի որ դեռևս չեն ուսումնասիրվել: Կարևոր է որոշել յուրաքանչյուր սովորողի գիտելիքները, հմտությունները ինչպես նաև ներուժը տվյալ թեմայից:

Բանավոր հարցում Նախնական հայտորոշման մյուս ձևը բանավոր հարցումն է: Բանավոր հարցման հիմնական առավելությունն այն է, որ դրանով ստուգվում են սովորողի ոչ միայն մտապահման ու վերարտադրման ընդունակությունները, այլ նաև նյութի գիտակցված ընկալման մակարդակը: Այն ավելի ամբողջական պատկերացում է տալիս աշակերտի մտածելու, տրամաբանելու, վերլուծելու, կարծիքը հիմնավորելու, ստեղծագործելու կարողությունների մասին:

Բանավոր հարցումը կարող է լինել անհատական և խմբային, սակայն ստուգման այս ձևը հնարավորություն չի տալիս միաժամանակ ստուգելու և ամրագրելու բոլորի նախնական գիտելիքներն ու հմտությունները:

Գրավոր աշխատանք

Կախված նպատակից հայտորոշման ձև կարող են ծառայել նաև գրավոր աշխատանքները, ինչպիսիք են՝ թելադրությունը, շարադրությունը, փոխադրությունը, էսսեն, թեստը, բաց հարցերով կարճ շարադրանք պահանջող առաջադրանքները:

Գործնական աշխատանք

Գործնական աշխատանքի միջոցով հայտորոշում կարելի է իրականացնել՝ որոշելու համար, թե ինչ հմտությունների և կարողությունների է տիրապետում սովորողը, որոնք կարող են հիմք հանդիսանալ մեկնարկվող թեմայի ուսումնասիրման համար:

Օրինակ՝ լեզուների դասավանդման ժամանակ դերախաղի կազմակերպում, թեմատիկ ֆիլմի դիտում և մեկնաբանում և այլն: Բնագիտական առարկաների դեպքում՝ փորձերի նախապատրաստում և անցկացում, չափումներ և այլն: Տեխնոլոգիա, կերպարվեստ, երաժշտություն, ֆիզիկական կուլտուրա և այլ առարկաների հայտորոշումը առավելապես հարմար է գործնական աշխատանքների կիրառմամբ:

Ձևավորող գնահատում

Ձևավորող գնահատումը ուսումնական գործընթացի բաղադրիչ է, որի նպատակն է բացահայտել յուրաքանչյուր սովորողի և ամբողջ դասարանի ձեռքբերումները, դժվարությունները, բացթողումները, ուսուցման և ուսումնառության գործընթացի բարելավման համար:

Ձևավորող գնահատումը չի ենթադրում տարբեր սովորողների ուսումնական արդյունքների համեմատում, այլ՝ սովորողի սեփական արդյունքների համեմատում:

Ձևավորող գնահատումն իրականացվում է 1-12-րդ դասարաններում:

Ձևավորող գնահատումն ապահովում է.

- 1) ներառական, փոխներգործուն և համագործակցային ուսուցման ու ուսումնառության միջավայրի ստեղծում,
- 2) սովորողի զարգացմանը նպաստող կառուցողական հետադարձ կապ,
- 3) սովորողի կողմից ինքնագնահատման և ինքնավերլուծության որակների ձեռքբերում:

Ձևավորող գնահատումը ուսուցչի կողմից գնահատման 5 բաղադրիչների պլանավորված և պարբերական օգտագործումն է ամենօրյա աշխատանքում

- Ուսուցչի կողմից արդյունավետ հետադարձ կապի ապահովում:
- Սովորողների ակտիվ մասնակցություն սեփական ուսումնառության գործընթացին:
- Ուսուցման գործընթացի ճշգրտում և շտկում՝ հաշվի առնելով գնահատման արդյունքները:
- Գնահատման՝ սովորողների մոտիվացիայի և ինքնագնահատականի վրա խորքային ազդեցության գիտակցում, որն իր հերթին կարևոր ազդեցություն ունի ուսուցման արդյունավետության վրա:
- Սովորողների կողմից իրենց գիտելիքները ինքնուրույն գնահատելու ունակության ձևավորում:

Ձևավորող գնահատման ձևերն ու մեթոդներն ընտրում է ուսուցիչը, որոնք հաստատվում են առարկայական մեթոդավորման կողմից և կարող են լրացվել կամ փոփոխվել ուսումնական տարվա ընթացքում:

Ձևավորող գնահատման ձևերն ընտրելիս ուսուցիչը պետք է հաշվի առնի յուրաքանչյուր սովորողի առանձնահատկությունները, ուսուցանվող նյութի բովանդակությունը և սովորողի կրթության առանձնահատուկ պայմանների կարիքը:

Ձևավորող գնահատումն իրականացվում է ուսուցչի և սովորողի կողմից՝ ինքնագնահատման, փոխադարձ գնահատման միջոցով:

Ուսուցչի և սովորողների կողմից գործածվող գնահատման ձևերը կարող են նույնը լինել, օրինակ՝ թեստ, քննարկում, նախագիծ և այլն:

Ձևավորող գնահատման համար կարող են օգտագործվել հետևյալ ձևերը.

- 1) գրավոր կարճ հարցում (թեստ)
- 2) բանավոր հարցում
- 3) գրավոր աշխատանք (թելադրություն, փոխադրություն, շարադրություն, արտագրություն և այլն)
- 4) գործնական աշխատանքներ
- 5) տնային աշխատանք
- 6) թղթապանակ
- 6) նախագծային աշխատանք

Ձևավորող գնահատման ձևերից յուրաքանչյուրի համար սահմանվում են չափանիշներ: Չափանիշները պետք է լինեն հստակ և ճշգրիտ, որպեսզի գնահատումը լինի օբյեկտիվ:

Չափանիշների հիման վրա ապահովվում է ուսուցչի և սովորողի միջև հետադարձ կապը, բացահայտվում է, թե առաջադրանքի կատարման ընթացքում սովորողը ինչ դժվարություններ ունի, ինչի հիման վրա էլ որոշվում են ուսուցման և ուսումնառության կազմակերպման հարմարեցումներն ու փոփոխությունները՝ որոնք ուղղված են սովորողի ուսումնառության արդյունքները բարելավելուն:

Ձևավորող գնահատում իրականացնելիս օգտագործվում են սովորողի ուսումնական ձեռքբերումները և դժվարությունները նկարագրող վերլուծություններ, մեկնաբանություններ:

Ձևավորող գնահատում իրականացնելիս միավոր չի տրվում:

Ձևավորող գնահատում անընդհատ գործընթաց է, որը պետք է իրականացնել յուրաքանչյուր դասին: Ձևավորող գնահատումը ուսուցչի և սովորողների համատեղ հետադարձ կապի անընդհատությունն է՝ երկկողմ գործունեության ճշգրտման, ուսուցման գործընթացի բարելավման և արդյունավետության բարձրացման նպատակով: Հետադարձ կապը ուսուցչին հնարավորություն է տալիս պատկերացնելու, թե ինչպես է ընթանում ուսուցման գործընթացը, տեղեկատվություն է տրամադրում սովորողների ձեռքբերումների և դժվարությունների մասին:

Ձևավորող գնահատման օբյեկտը սովորողի գործունեությունն է, ոչ թե սովորողը և ուղղված է սովորողի ուսումնառության նպատակի իրագործմանը: Հետևաբար, գնահատման բոլոր ձևերի և տեսակների ընտրության հիմքը ուսուցման նպատակի հստակ ձևակերպումն է:

Յուրաքանչյուր դասին ուսուցչի համար կարևոր է խորհել հետևյալ հարցերի շուրջ.

- Որքանո՞վ են սովորողները հասկացել անցած նյութը:
- Ինչպե՞ս կարող եմ ստուգել:
- Ո՞ր առաջադրանքն էր դժվար սովորողների համար:
- Եթե առաջադրանքը դժվարություն է առաջացրել, ապա ի՞նչը պետք է փոխել դասավանդման մեթոդներում:

Գիտենք, որ չափազանց կարևոր է սովորողների ակտիվ մասնակցությունը իրենց ուսումնական գործընթացին և ձևավորող գնահատման ճիշտ և պարբերական կիրառումը կապահովի ցանկալի ներգրավվածությունն ու ակտիվ մասնակցությունը: Վերջնարդյունքները ևս պետք է հասկանալի լինեն սովորողներին՝ նրանց դարձնելով գնահատման չափանիշների

մշակման մասնակից: Նպատակներն ու վերջնարդյունքները կարելի է ներկայացնել, որպեսզի ուսուցիչն ու սովորողները հնարավորություն ունենան անդրադառնալու դրանց և ստուգելու իրենց ձեռքբերումները:

Ինքնագնահատում

Ինքնագնահատումը ձևավորող գնահատման կարևոր բաղադրիչներից է, առանց որի ձևավորող գնահատումը չի կարող արդյունավետ լինել: Ինքնագնահատման և փոխադարձ գնահատման կարևոր առանձնահատկությունը գնահատողի դերի ստանձնումն է: Ինքնագնահատման և փոխադարձ գնահատման դեպքում գնահատողը սովորողն է:

Սովորողի ուսումնական առաջընթացի համար կարևոր հիմք են նրա ճիշտ պատկերացումներն ուսումնական նյութի իր իմացության մակարդակի ու սեփական ուժերով թերությունները վերացնելու կարողության մասին: Այդ նպատակներին է ծառայում ինքնագնահատման կանոնավոր կիրառումը:

Որպեսզի հստակ ընկալվի, թե ինքնագնահատումը որքանով կարող է նպաստել սովորողի ուսումնառության արդյունավետությանը, անհրաժեշտ է նրան հնարավորություն ընձեռել և օգնել՝ անդրադառնալու հետևյալ անհրաժեշտ գործողություններին .

- որպես մտածող և սովորող իր գիտելիքի մակարդակը ինքնուրույն պարզելուն,
- սեփական ուսման որակը բարելավելու միջոցներ փնտրելուն և դրանք կիրառելու ռազմավարություն մշակելուն:
- առաջադրանքը հստակ պատկերացնելուն,

Ինքնագնահատման նպատակն է՝ ընդլայնել աշակերտի ճանաչողությունը, ինքնաճանաչումը, արժեքային համակարգը, ինչպես նաև ձևավորել պատասխանատվություն: Առաջադրանքի վերլուծությունից հետո կարևոր է, որ աշակերտը տեսնի և հասկանա ձեռքբերումներն ու դժվարությունները և դրանց շտկման համար դրսևորի համապատասխան վերաբերմունք, ձգտում և կամք: Օրինակ, եթե ուսուցչի հետ միասին կարդում են շարադրությունը, և սովորողը կարողանում է նկատել իր սխալներն ու թերությունները և ասել, թե ինչպես կարելի է շտկել, դա ինքնագնահատման դրսևորում է:

Որպեսզի ուսանելը լինի արդյունավետ, սովորողին պետք է հասցնել իր ձեռքբերումների առկա և վերջարդյունքների միջև եղած տարբերության նվազեցնելու գիտակցությանը: Այդպիսի որակներով օժտված սովորողն ուսուցչի ուղղորդմամբ կարող է վերացնել իրական և ցանկալի արդյունքի միջև եղած ճեղքվածքը:

Եթե սովորողը հաճախ կատարի ինքնագնահատման աշխատանքներ, ապա դա նրան կօգնի ճիշտ պատկերացում կազմել իր ձեռքբերումների և դժվարությունների մասին՝ պատասխանատու դառնալով իր ուսումնառության համար:

Ինքնագնահատումը սովորողից պահանջում է իր կատարած աշխատանքների նկատմամբ հետադարձ դատողություններ անելու կարողություն, որն արդյունավետ սովորելու համար կարևոր առանձնահատկություն է:

Սովորողի ինքնագնահատման գործում կարևոր դեր է վերապահված ուսուցչին: Նա պետք է օգնի սովորողին հասկանալ, թե ինչին և ինչպես պետք է փորձի հասնել: Նպատակը

սովորողին հասկանալի դարձնելուց հետո, ուսուցչի հաջորդ խնդիրը սովորողի անելիքները պարզաբանելն էրը նրան կհասցնի հաջողության: Ինքնագնահատման հմտությունների ձևավորումը սովորողին հնարավորություն է տալիս արժեքավոր դատողություններ անել իր և այլոց ձեռքբերումների վերաբերյալ, համեմատել իր ներկա և պահանջվող մակարդակները, հեշտությամբ վերացնել սեփական թերությունները:

Ինքնագնահատում իրականացնելու համար կարելի կիրառել ձևավորող գնահատման տարբեր գործիքներ, ինչպիսիք են, օրինակ՝ հարցաթերթերը, գնահատման անիվը, ստուգաթերթերը, ելքի քարտերը և այլն: Ձևավորող գնահատման ցանկացած գործիք կարելի է կիրառել ինքնագնահատման և փոխադարձ գնահատման նպատակով: Կարևոր է, որ ցանկացած գործիք կիրառելիս պահպանվեն և կիրառվեն գնահատման նույն չափանիշները, այսինքն՝ եթե նույն գործիքով գնահատում է և ուսուցիչը և սովորողները, ապա գնահատումը պետք է իրականացվի նույն չափանիշներով, որոնք նախապես հայտնի են գնահատողներին և գնահատվողներին:

Փոխադարձ գնահատում

Փոխադարձ գնահատման միջոցով սովորողները տեղեկանում են իրենց աշխատանքի ուժեղ և թույլ կողմերի, սխալների մասին, անհրաժեշտության դեպքում ստանում են լրացուցիչ առաջադրանքներ և հանձնարարություններ՝ բացթողումները լրացնելու համար:

Փոխադարձ գնահատում իրականացնում են

1. սովորողը՝ սովորողին,
2. խումբը՝ խմբին,
3. սովորողը՝ խմբին,
4. խումբը՝ սովորողին:

Կարևոր է, որ ուսուցչի կամ դասընկերոջ կողմից ապահովվի սովորողի առաջընթացը խթանող հետադարձ կապ. դա կօգնի սովորողին գնահատել իր ուսումնառության ընթացքը: Էական է, որ փոխստուգում իրականացնող սովորողն իր դասընկերոջ աշխատանքը գնահատելիս լինի օբյեկտիվ:

Այս գործընթացը զարգացնում է սովորողի մտածողությունը և տրամաբանությունը. ամեն անգամ սովորողը ընկերոջ սխալները նկատելիս՝ անում է համապատասխան պարզաբանումներ, բերում հիմնավորված և փաստարկված օրինակներ: Դրանով բարձրանում է նրա ուսումնառության արդյունավետությունը և արժևորվում նրա ձեռք բերած գիտելիքներն ու հմտությունները:

Փոխադարձ գնահատումը նպաստում է, թե գնահատողի, թե գնահատվողի սեփական իմացության վերարժևորմանը: Դա առաջընթացը խթանող հանգամանք է, քանի որ սովորողներից պահանջվում է՝

- անձնական մեծ պատասխանատվություն,
- անդրադարձ սեփական ուսումնառությանը,
- ինքնարժևորում ու գնահատման հիմնավորում:

Փոխադարձ գնահատման և ինքնագնահատման աշխատանքների շնորհիվ ուսումնական գործընթացում պահովվում է յուրաքանչյուր սովորողի գործուն ընդգրկվածությունը:

Գրավոր կարճ հարցում

Ձևավորող գտնահատման ձևերից է գրավոր կարճ հարցում իրականացնելիս պետք է ուշադրություն դարձնել, թե ով է գնահատելու, ում ենք գնահատելու, ինչ գիտելիքներ և հմտություններ ենք ստուգելու և ինչպես ենք օգտագործելու գնահատման արդյունքները: Կախված թեմայի ուսուցման նպատակից և թեմայի յուրացման արդյունքում ակնկալվող վերջնարդյունքներից՝ որոշվում են բովանդակությունը և ստուգման մեթոդաբանությունը:

Օրինակ՝ ուսուցիչը կարող է առաջադրանքների ճիշտ պատասխանները նախապես գրել գրատախտակին կամ ցուցապաստառին և սովորողներին ցույց տալ առաջադրանքի կատարման ավարտից հետո: Սովորողները հնարավորություն կունենան համեմատելու իրենց աշխատանքի արդյունքները ճիշտ պատասխանների հետ և ինքնուրույն շտկելու բացթողումները:

Գրավոր կարճ հարցումը կարելի է անցկացնել նաև թեստի միջոցով բնութագրիչ առանձնահատկություններ են.

- նախատեսվում է կարճ ժամանակի համար (5-10 րոպե)
- կազմվում են նույն գիտելիքը, կարողությունը կամ հմտությունը ստուգող հարցեր կամ առաջադրանքներ (2-3 հարց, կամ մեկ պարզ առաջրանք), ,
- հարցերը մատչելի են սովորողների մեծ մասի համար արդյունքները հեշտ վերլուծելի են
- ստուգվում են տեղում և հետադարձ կապը տրվում է անմիջապես

Բանավոր հարցում

Ձևավորող գնահատման ձևերից մեկը բանավոր հարցումն է, որն իրականացվում է բոլոր դասարաններում և բոլոր առարկաներից: Բանավոր հարցման ժամանակ պետք է հաշվի առնել բանավոր խոսքին առնչվող որոշակի չափանիշներ: Բանավոր հարցման միջոցով ստուգվում է, ինչպես սովորողի մտապահման ու վերարտադրման, այնպես էլ նյութի գիտակցված ընկալման, վերլուծության մակարդակը:

Բանավոր հարցման ձևեր են մտքերի տարափր, հարց ու պատասխանը, զրույցը, ուսումնական նյութի վերարտադրումը, բանավեճը, դեբատը, երկխոսությունը, նախագծերի ներկայացումը, դերային խաղը, մենախոսությունը, շնորհանդեսների ներկայացումը և այլն:

Բանավոր հարցման ընթացքում կարող են կիրառվել բանավոր խոսքի գնահատման տարբեր ուրբրիկներ՝ կախված այն բանից, թե ինչ նպատակով և բանավոր խոսքի ինչ ձև են կիրառվելու:

Բանավոր հարցման նպատակն է՝ պարզել սովորողի՝ մտքերը քերականորեն և շարահյուսորեն ճիշտ ձևակերպելու, խոսքը տրամաբանորեն շարադրելու, հակիրճ և ընդարձակ ձևակերպելու (ըստ անհրաժեշտության), գլխավոր միտքը դուրս բերելու, փաստարկելու, վերլուծելու և հիմնավորելու կարողությունները: Բանավոր հարցման միջոցով կարող է պարզվել նաև սովորողների հաղորդակցվելու կարողությունը:

Այս բոլոր կարողությունները կարող են գնահատվել բանավոր խոսքի ստուգման համար մշակված տարբեր ուրբրիկներով: Արդյունքները ամփոփելուց հետո ուսուցիչը և սովորողները ծրագրում են նկատված թերությունները վերացնելու ուղիները:

Գրավոր աշխատանք

Գրավոր աշխատանքները կիրառվում են գնահատման բոլոր տեսակների պարագայում, սակայն տարբեր նպատակներով: Ձևավորող գնահատման տեսանկյունից կարող են տրվել գրավոր աշխատանքի այնպիսի տեսակներ, ինչպիսիք են արտագրությունը, թելադրությունը, շարադրությունը, էսսեն, փոխադրությունը և այլն:

Դիտարկենք գրավոր աշխատանքի տեսակներից մեկը՝ թելադրությունը ձևավորող գնահատման տեսանկյունից:

Թելադրության միևնույն տեքստի վրա կարելի է ձեռնարկել որոշակի քայլեր՝ երեխային աստիճանաբար ակտիվ սովորող դարձնելու համար: Ուսուցիչը կարող է աշխատանքում նշումներ չկատարել Այլ կանաչ գույնի գրիչով դուրս բերել սովորողի թույլ տված սխալներն վրիպակներն ու ջնջումներն իրենց ճիշտ տարբերակով, և տալ առաջադրանք՝ դրանք տեքստում ինքնուրույն գտնելու և ուղղելու:

Առաջադրանքը կատարելու համար սովորողը «ստիպված է լինելու» առնվազն մի քանի անգամ կարդալ տրված օրինակները, տեքստում դրանք գտնել և ինքնուրույն ուղղել, ինչը ոչ թե մեխանիկական, այլ ակտիվ մտածական աշխատանք է (համեմատում տվյալ դեպքում): Այս դեպքում ուսուցչի և սովորողի գործողությունները հավասարակշռվում են: Այս, և այլ տարբերակներ կարելի է գտնել հետևյալ հղմամբ՝

https://kznakgnahatum.blogspot.com/p/blog-page_69.html

Ուսուցիչն ավելի ակտիվ դեր է հատկացնում սովորողին, որն արդեն ոչ միայն ինքնուրույն կողմնորոշվում, այլև ինքնուրույն բարելավում է սեփական աշխատանքը՝ առաջնորդվելով ուսուցչի պայմանական նշաններով: Գնահատման նույն սկզբունքները կարելի է կիրառել նաև գրավոր աշխատանքի այլ տեսակների դեպքում: Կարևոր է պահպանել ձևավորող գնահատման բաղադրիչների ամբողջականությունն ու հաջորդականությունը: Միշտ պետք է հիշել հետադարձ կապի մասին. առհասարակ ցանկացած աշխատանքից հետո անհրաժեշտ է քննարկել արդյունքները, որպեսզի սովորողները հնարավորություն ունենան արժևորելու աշխատանքի ստեղծագործական և ինքնատիպ մոտեցումները:

Աշխատանքի կազմակերպման այս մոտեցումը կիրառելի է դպրոցի բոլոր աստիճաններում և բոլոր ուսումնական առարկաների շրջանակում՝ հաշվի առնելով յուրաքանչյուր առարկայի առանձնահատկությունները:

Գործնական աշխատանք

Սովորողի ձեռք բերած գիտելիքները հիմնավոր և օգտակար կլինեն այնքանով, որքանով նա կարող է դրանք կիրառել: Այդ գիտելիքները կիրառելու կարողությունը զարգացնելու նպատակով անհրաժեշտ են գործնական աշխատանքները: Ելնելով ուսումնական առարկայի առանձնահատկություններից՝ գործնական աշխատանքները կարող են լինել տարբեր՝ տեղանքում կողմնորոշվել, չափումներ կատարել, քարտեզագրել, գործիքներով աշխատել, փորձեր կատարել, մոդելավորել, մակետներ, պաստառներ, տեսանյութեր ստեղծել, բանավեճ, քննարկում, դերախաղ իրականացնել, S<S գործիքներ կիրառել և այլն:

Գործնական աշխատանքը ձևավորող գնահատման արդյունավետ ձևերից է, որի նպատակն է հանրակրթության պետական նոր չափորոշչով սահմանված 8 առանցքային կարողունակությունների զարգացման ապահովումը:

Գործնական աշխատանքների դասակարգման հիմքում դրվում է սովորողի գործունեության ձևը, և ըստ այդմ գործնական աշխատանքները բաժանվում են 3 խմբի՝

- *վերարտադրողական*, որոնք հնարավորություն են տալիս ցուցադրելու՝ ինչ է սովորել և ինչ է կարողանում անել սովորողը (օրինակ՝ քարտեզի վրա ցույց տալ քաղաքներ, գետեր, լճեր և այլն),
- *մասամբ որոնողական*, երբ սովորողը պետք է ոչ միայն ցույց տա՝ ինչ է սովորել և ինչ է կարողանում, այլև կատարի լրացումներ, լուծի իրեն առաջադրված խնդիրը (օրինակ՝ տրված տեղանունները, գետերը, լճերը և այլն պայմանական նշաններով պատկերել քարտեզի վրա),
- *սրտեղծագործական*, երբ սովորողը ինքը պետք է ինքնուրույն կամ խմբի անդամների հետ լուծում գտնի առաջադրված խնդրի համար՝ ցուցադրելով կարողունակությունների զարգացման որոշակի մակարդակ (օրինակ՝ կազմել տեղանքի քարտեզը, ինչի համար սովորողը պետք է դրսևորի ոչ միայն մեկ, այլ մի քանի առարկաների, այլև վերառարկայական հմտություններ):

Վերոնշյալից արդեն պարզ է դառնում, որ գործնական աշխատանքները բազմազան են՝ պատասառի ձևավորումից մինչև էքսկուրսիայի ընթացքում տեսաձի ու լսածի ներկայացում աղյուսակի, ֆիլմի, ակնարկի տեսքով, երգի հորինումից մինչև նախագծի իրականացում, արդյունքների ներկայացում ու կիրառում:

Նշված գործնական աշխատանքները կարող են իրականացվել ինչպես անհատապես, այնպես էլ խմբային աշխատանքով, դպրոցում, տանը կամ այլ վայրում, գնահատվել բալերով կամ բառային բնութագրումներով: Արդյունքները կարող են ներկայացվել սովորողի կամ սովորողների խմբի ընտրությամբ՝ նպատակից ելնելով:

Տնային աշխատանք

Սովորողն իր անհատական կամ համագործակցային աշխատանքները կատարելու է նաև տանը: Ուսուցիչը դասի ընթացքում կամ դրանից դուրս պետք է կարողանա ստուգել և սովորողի հետ վերլուծել տնային աշխատանքներում ցուցաբերած առաջընթացն ու թերությունները: Տնային հանձնարարությունները պետք է լինեն ոչ մեծ ծավալի, որպեսզի չզբաղեցնեն սովորողի հանգստի, խաղի, սնվելու, նախասիրությամբ զբաղվելու և քնի համար նախատեսվող ժամանակը և տնային աշխատանքի համար պետք է հանձնարարել դասարանում կատարած առաջադրանքների նմուշներից: Կարելի է նաև տնային աշխատանքեր հանձնարարելիս կիրառել տարբերակված մոտեցում: Տնային աշխատանքը նպաստում է սովորողի ինքնուրույն և խմբային աշխատանք կատարելու կարողության զարգացմանը: Տնային աշխատանքների ստուգումը, քննարկումն ու վերլուծությունը պետք է արվեն հնարավորինս հաճախ, որպեսզի ձևավորվի պատասխանատվություն և տնային աշխատանքի կարևորության ընկալում: Սակայն պետք է նշել, որ պարտադիր չէ յուրաքանչյուր դասից հետո տնային աշխատանք հանձնարարելը, հատկապես, եթե ուսուցիչը վստահ է, որ երեխաները յուրացրել են ուսումնական նյութը:

Ուսումնական թղթապանակ

Յուրաքանչյուր սովորողի համար ստեղծվում է սովորողի ձեռքբերումների թղթապանակ, որի մեջ ներառվում են սովորողի ամփոփիչ գնահատումների արդյունքները, ինչպես նաև սովորողի կողմից ընտրված աշխատանքները:

Թղթապանակը սովորողի «ուսումնառության պատմությունն» է, նրա հաջողությունների, անձի զարգացման, ստեղծագործական աճի վկայությունը՝ կոնկրետ օրինակների և ուղեկցող դիտարկումների տեսքով: Թղթապանակը ուսումնական գործընթացի վերաբերյալ տեղեկատվության հավաքման և պահման լավագույն տարբերակներից է, որը ծառայում է սովորողի առաջընթացն ու ձեռքբերումները տեսանելի դարձնելուն: Թղթապանակը կազմվում է մեկ ուսումնական տարվա համար և տարեվերջին ծնող - ուսուցիչ հանդիպման ժամանակ հանձնվում է սովորողի ընտանիքին: Ուսումնական թղթապանակի բովանդակության մաս են կազմում նաև սովորողի վերաբերյալ ուսուցչի, համադասարանցիների, ծնողների նշումները, դիտարկումները և սովորողի հետ զրույցների, հարցազրույցների նկարագրությունները:

Ուսումնական թղթապանակը նպաստում է սովորողների, ուսուցիչների համագործակցությանը, հնարավորություն է ընձեռում գնահատելու ուսման ընթացքում ներդրված ջանքերը, ձեռքբերումներն ու առաջընթացը:

Նախագծային աշխատանք

Պարզ նախագծային աշխատանքներ կարող են իրականացվել նաև տարրական կրթական աստիճանում, հիմնական կրթական աստիճանի 5-6-րդ դասարաններում նույնպես՝ ըստ ցանկության և ուսուցողական նպատակով, իսկ 7-12-րդ դասարաններում առնվազն մեկ նախագծային աշխատանքի կատարումը պարտադիր է յուրաքանչյուր սովորողի համար: 1-4-րդ դասարաններում և 5-րդ դասարանի առաջին կիսամյակում նախագծային աշխատանքների ողջ ընթացքում պետք է կատարվի ձևավորող գնահատում, իսկ արդյունքներն ամփոփվեն՝ բնութագրով, 5-րդ դասարանի երկրորդ կիսամյակից մինչև 6-րդ դասարանը ներառյալ՝ նախագծի արդյունքները կարող են ամփոփվել և՛ բնութագրով, և՛ միավորով, իսկ 7-12-րդ դասարանում՝ միավորով: Սակայն հատկանշականն այն է, որ նախագծի մշակման ողջ ընթացքում ուսուցիչը պետք է իրականացնի արդյունավետ ձևավորող գնահատում և հետադարձ կապ: Նախագծային աշխատանքների կատարման մեթոդաբանությունը նկարագրված է «Ամփոփիչ գնահատում» բաժնում:

Հետադարձ կապ

Ձևավորող գնահատման բաղադրիչների շրջափուլում կարևոր է հատկապես հետադարձ կապի տրամադրումը: Ցանկացած աշխատանքից հետո անհրաժեշտ է քննարկել արդյունքները, որպեսզի սովորողները հնարավորություն ունենան արժևորելու իրենց ձեռքբերումները, աշխատանքի ստեղծագործական և ինքնատիպ մոտեցումները և բարելավելու իրենց բացթողումները:

Հետադարձ կապն ուսուցման և ուսումնառության գործընթացում սովորողների և ուսուցչի կատարած որոշակի գործողությունների վերաբերյալ փոխադարձ համարժեք արձագանքն է: Այսինքն՝ հետադարձ կապը միջոց է ուսուցչի գործողություններին սովորողների կողմից, սովորողների կողմից ուսուցչի գործողություններին տրվող անդրադարձի: Հետադարձ կապ

ապահովելիս ուսուցիչը պետք է սովորողին ուղղի քաջալերող խոսք, հուշումներ, ստուգող բաց և փակ հարցեր, որոնք կօգնեն նրան հասկանալ իր ուժեղ կողմերը, բացահայտել բացթողումները և ուսումնառության արդյունքը բարելավելու ուղիներ գտնել:

Այսպիսով՝ հետադարձ կապի նպատակը սովորողի ուսումնառության առկա մակարդակն ակնկալվող վերջնարդյունքին հնարավորինս մոտեցնելն է: Սա նշանակում է, որ հետադարձ կապի համար ընտրված զանազան միջոցներն ու հնարները պետք է բխեն սովորողին միայն առաջ մղելու, իր ձեռքբերումները խորացնելու, թերացումներն արագ վերացնելու և արդյունքները բարելավելու նպատակից:

Հետադարձ կապը լինում է երկու տեսակի՝ արտաքին և ներքին:

Արտաքին հետադարձ կապն ապահովում է ուսուցիչ - սովորող, սովորող - ուսուցիչ կամ սովորող - սովորող կապերը: Ուսուցիչն ու սովորողները միմյանց կատարած գործողությունների վերաբերյալ իրականացնում են համապատասխան վերլուծություններ՝ փոխադարձաբար անդրադառնալով աշխատանքում եղած ձեռքբերումներին և թերություններին:

Ներքին հետադարձ կապն ուսուցչի և սովորողների սեփական գործողությունների նկատմամբ կատարած ինքնաանդրադարձն է: Ե՛վ ուսուցիչը, և՛ սովորողը կարիք ունեն ինքնավերլուծության: Ուսուցիչը ստացված արդյունքները վերլուծելով՝ բացահայտում է իր գործողությունների ստացված և չստացված պահերը, դրանց հիման վրա պլանավորում հետագա գործողությունները, իսկ աշակերտը իր գործողությունները վերլուծելով՝ բարելավում է իր ուսումնառությունը:

Հետադարձ կապի իրականացման միջոցները

Բանավոր զրույց. երբ վերլուծությունները և շտկումները կատարվում են բանավոր քննարկման միջոցով: Հարցուպատասխանի, տարբեր հարցերի վերհանման միջոցով բանավոր քննարկվում են այն գործողությունները, որոնք բարելավման կարիք ունեն, ինչու չէ, նաև հնարավոր է նորից ընկերների կամ ուսուցչի օգնությամբ անդրադառնալ այն կետերին, որոնք կօգնեն վերացնել աշխատանքի թերությունները:

Գրավոր մեկնաբանություն. երբ վերլուծություններն ու բարելավման առաջարկներն իրականացվում են գրավոր:

Գծապատկեր. երբ ուսուցիչը հետադարձ կապը տալիս է գծապատկերների միջոցով: Այս միջոցը բարձրացնում է տեղեկատվության յուրացման արդյունավետությունը, քանի որ ուսուցչի՝ սովորողին կամ սովորողներին ուղղված խոսքը ուղեկցվում է նշաններով և գծանկարներով, որոնք կարող են լինել նախապես պայմանավորված նշաններ, սիմվոլներ, հուշող պատկերներ և այլն:

ՏՀՏ միջոցներն արդեն անդառնալի կերպով մուտք են գործել ուսուցման բոլոր գործընթացներ, հետևաբար այս հնարավորությունը նույնպես պետք է օգտագործել արդյունավետորեն: Տեղեկույթը, վերլուծությունները սովորողի համար դառնում են ավելի հետաքրքիր և արդիական, երբ իրենց հետ շփվում են, այսպես կոչված՝ «ընդունելի միջոցներով»:

Արդյունավետ հետադարձ կապ ապահովելու համար, օրինակ՝ տեսագրությունը, ձայնային հաղորդագրությունները հնարավորություն են ընձեռում կատարված աշխատանքին կարճ և դիպուկ վերլուծություն կամ մեկնաբանություն տալու:

Արդյունավետ հետադարձ կապ ապահովելու համար անհարժեշտ է պահպանել հետևյալ սկզբունքները.

Անհատական. Երբ սովորողը հասկանում է, որ ուղղորդող և շտկող հարցերն ուղղված են հենց իրեն, այլ ոչ ամբողջ դասարանին:

Օբյեկտիվ և նրբանկատ. հետադարձ կապի միջոցով պետք է մանրամասն նկարագրել սովորողի գործողությունները և բացառել հուզական գնահատականը նրա կատարած քայլերին: Սովորողի համար բավականին տհաճ է և տեղին չէ, երբ իրեն քննադատում կամ պարսավում են այս կամ այն սխալի համար: Բայց եթե նրա նկատմամբ օբյեկտիվ են, այսինքն՝ վերլուծում են իր աշխատանքը, այլ ոչ թե իրեն՝ մեղադրում կամ հեզնում, նա դրական և պատրաստակամ է մոտենում վերլուծական աշխատանքին:

Բացթողումների պատճառների վերհանում. և սովորողի կատարած քայլերի վերլուծությունը, թույլ է տալիս նրան ինքնուրույն հասկանալ և շտկել իր կատարած բացթողումները: Հետադարձ կապն ամբողջովին պետք է կր ուսուցանող բնույթ, ուստի կարևոր է ոչ թե ուղիղ ձևով սովորողին իր սխալները ցույց տալը, այլ հարցերի և պարզաբանումների միջոցով նրան օգնելը, որ դրանք ինքնուրույն գտնի:

Ճիշտ տեղին և ժամանակին. հետադարձ կապը պետք է տալ այն ժամանակ, երբ հարցերի ճշգրտումը տեղին է և ժամանակին: Այս սկզբունքի իմաստը հետադարձ կապի ժամանակավրեպ չլինելու մասին է: Ուսուցիչը պետք է հնարավորություն և ժամանակ տա սովորողին իր սխալները գտնելու և շտկելու, քանի դեռ նա գործընթացի մեջ է:

Մոտիվացիայի ապահովում. Երբ հետադարձ կապի մեջ շեշտադրվում է սովորողի ձեռքբերումները՝ դրանով ապահովվելով նրա դրական տրամադրվածությունն ու մոտիվացիան: Հաճույքով կատարված աշխատանքի արդյունավետությունը սովորաբար ավելի բարձր է լինում:

Կարճ և հետաքրքիր. Կարելի է յուրաքանչյուր սխալի համար տրամադրել կարճ տեղեկություն՝ համեմտելով խաղային կամ այլ հետաքրքիր տարրերով:

Այս բոլոր հնարները կարելի է ոչ միայն կիրառել ուսուցիչ – սովորող փոխհարաբերություններում, այլ նաև կարելի է պարզեցնել և հարմարեցնել սովորող – սովորող համագործակցության համար: Նշենք այն անհերքելի միտքը, որ ավելի լավ սովորում է նա, ով սովորեցնում է: Հետևաբար, արդյունավետ հետադարձ կապ պետք է ապահովել նաև սովորողների միջև: Հետադարձ կապը կարելի է համարել հաջողված, եթե այն համապատասխանում է հետևյալ երեք կանոններին.

Ընկալում. երբ սովորողի մոտ ձևավորվել է հստակ պատկերացում իր ուժեղ կողմերի և նրանց զարգացման հնարավոր ուղիների մասին:

Ընդունում. երբ սովորողը ստացած տեղեկատվությունը ընդունում է և ներքին համաձայնության գալիս դրանց հետ:

Հեռանկար. երբ սովորողն ունի ցանկություն ուղղելու սեփական սխալները, և նա արդեն կատարել է առաջին քայլերն իր գիտելիքների բարելավման ուղղությամբ:

Ընդհանրացնելով կարող ենք ավելացնել, որ հետադարձ կապը ուսուցման և ուսումնառության անբաժանելի մասն է: Որքան այն արդյունավետ է, որքան շեշտադրվում են սովորողների ձեռքբերումները և իրականացվում է աշխատանքի պատշաճ վերլուծություն, այնքան ավելի մեծ է հավանականությունը, որ սովորողները շարունակաբար կբարելավեն իրենց առաջադիմությունը:

Շատ կարևոր է որ ուսումնառության ողջ ընթացքում սովորողն իրեն հարգված և կարևորված զգա, հասկանա, որ իր կրթության հանդեպ առկա է պատասխանատու և հետևողական վերաբերմունք:

Ամփոփիչ գնահատում

Ամփոփիչ գնահատման նպատակն է՝ ուսումնական առարկաների չափորոշիչներով և ծրագրերով սահմանված վերջնարդյունքներին համապատասխան սովորողների ուսումնական ձեռքբերումների գնահատումը՝ դասի, թեմայի, կիսամյակի, ուսումնական տարվա, ինչպես նաև կրթական աստիճանի ավարտին՝ ամփոփիչ ատեստավորման միջոցով:

Ամփոփիչ գնահատման արդյունքների հիման վրա ձևավորվում է կիսամյակային, իսկ կիսամյակային գնահատման արդյունքների հիման վրա՝ տարեկան ամփոփիչ գնահատականը:

Հաստատության 1-4-րդ դասարանների և 5-րդ դասարանի (առաջին կիսամյակ) սովորողների կիսամյակային ամփոփիչ գնահատումը կատարվում է բնութագրման միջոցով: Յուրաքանչյուր սովորողի համար կազմվում է ուսումնական առաջադիմության բնութագիր:

Հաստատության 5-րդ դասարանի 2-րդ կիսամյակից մինչև 12-րդ դասարանը ներառյալ ամփոփիչ գնահատումն իրականացվում է միավորային գնահատման միջոցով:

Պետական ամփոփիչ ատեստավորումը իրականացվում է հանրակրթական հիմնական ծրագրերի աստիճանի ավարտին՝ կրթության կառավարման լիազորված մարմնի կողմից սահմանած կարգով:

Ամփոփիչ գնահատումը իրականացվում է միավորային և բնութագրող գնահատման միջոցով:

ՄԻԱՎՈՐԱՅԻՆ ԳՆԱՀԱՏՈՒՄ

Միավորային գնահատման կիրառման դեպքում սովորողների ուսումնառության արդյունքների քանակական ցուցիչը գնահատականն է, որն արտահայտվում է նիշերով:

Միավորային գնահատման համար կիրառվում է սովորողների ուսումնառության արդյունքների գնահատման 10-միավորային սանդղակ, որտեղ որևէ նիշ անբավարար գնահատական չէ:

Միավորային գնահատման արդյունքները գրանցվում են էլեկտրոնային դասամատյանում:

Միավորային գնահատման անհնարինության դեպքում դասամատյանում գրանցումներն արվում են հետևյալ նշաններով՝

1. սովորողի բացակայության դեպքում՝ «բ».

2. պատասխանելուց հրաժարվելու, գրավոր աշխատանքը չկատարելու դեպքում՝ «-»:

Կրթության առանձնահատուկ պայմանների կարիք ունեցող սովորողի միավորային գնահատումն իրականացվում է գնահատման ընդհանուր սկզբունքով՝ 10-միավորային սանդղակով:

Միավորային գնահատումը կարող է իրականացվել գնահատման հետևյալ ձևերով՝

- 1) թեստ
- 2) բանավոր հարցում
- 3) գրավոր աշխատանք
- 4) գործնական աշխատանք
- 6) նախագծային աշխատանք

Թեմատիկ աշխատանք

Թեմատիկ գրավոր աշխատանքն ամփոփիչ գնահատման ձև է, որի իրականացման ընթացքում սովորողն իր ուսանած ուսումնական նյութը ներկայացնում է հիմնականում գրավոր: Կախված ուսումնական առարկայից և թեմայից՝ թեմատիկ աշխատանքը կարող է լինել նաև բանավոր, գործնական կամ դրանց համադրմամբ:

Այդ աշխատանքները տրվում են ծրագրային որոշակի թեմա ուսուցանելուց հետո, որի նպատակն է պարզել, թե սովորողները որքանով են յուրացրել թեմայից ուսումնասիրած նյութը:

Թեմատիկ գրավոր աշխատանքի արդյունավետ ձև է **թեստը**, որը նվազագույն առաջադրանքների քանակով և ժամանակի ծախսով առավելագույն արդյունք է ապահովում:

Կազմելիս շատ կարևոր է պարզ պատկերացնել այն ուսում-նական նպատակը, որի համար այն նախատեսված է: Առանց նպատակի հստակեցման՝ թեստը հիմնականում վերածվում է առաջադրանքների անհասկանալի համախմբի:

Թեստային աշխատանքում պետք է ընդգրկվեն սովորողներին ներկայացվող չափորոշիչային պահանջներին համապատասխան առաջադրանքներ՝ դրանց յուրացման մակարդակը բացահայտելու նպատակով: Առաջադրանքները կարող են տրվել հարցարաններով, որոնցում ներառվում են տարաբնույթ առաջադրանքներ, դրանցից են.

- ճիշտ պատասխանի ընտրության,
- համապատասխանեցման,
- լրացման,
- կարճ պատասխանով,
- ընդարձակ պատասխանով,
- ստեղծագործական և այլն:

Թեստի միջոցով բացի սովորողի գիտելիքից, հնարավոր է ստուգել նաև հմտություններն, արժեքային համակարգը և վերաբերմունքը (հատկապես տարրական դասարաններում, հասարակագիտական առարկաներում և կախված առարկայի առանձնահատկություններից):

Թեստի հիմնական հատկորոշիչները, որոնք կազմում են, այսպես կոչված, թեստի «նախագիծը», որոշում են թեստի կառուցվանքն ու բովանդակությունը: Դրանք են՝

- Ո՞ր դասարանի համար է նախատեսված:
- Ո՞ր թեմայի կամ թեմաների վերաբերյալ է կազմված:
- Ի՞նչ կոնկրետ նպատակ է հետապնդում:
- Ո՞ր վերջնարդյունքներն են ստուգվելու:
- Ի՞նչ տիպի առաջադրանքներ են մշակվելու:
- Քանի՞ հարց է ներառվելու:
- Որքա՞ն ժամանակ է հատկացվելու թեստին:
- Որքան միավոր է տրվելու յուրաքանչյուր ճիշտ պատասխանի համար:

Ունենալով թեստի հատկորոշիչները՝ ուսուցիչը հեշտությամբ կարող է ստեղծել տարբեր թեստեր, ինչպես նաև թեստի տարբերակներ:

Թեստը կազմելիս պետք է հաշվի առնել մի շարք գործոններ: Թեստը համարվում է **հուսալի**, եթե թեստի արդյունքները գրեթե նույնն են տարբեր օրերին նույն խմբին ստուգելու դեպքում, կամ միաժամ-մա-նակ երկու համարժեք թեստերի տրամադրման դեպքում ստացվում են

գրեթե նույն արդյունքները: Հուսալիությունն ստուգման արդյունքում գրանցված միավորի հարաբերական կայունությունն է:

Թեստը պետք է լինի **հավաստի**, այսինքն, ստուգի այն գիտելիքը, կարողությունն ու հմտությունը, որը նախատեսված է ստուգել: Օրինակ՝ լեզուներում, եթե ուզում ենք ստուգել գրելու կամ կարդալու որևէ հմտություն, ապա ընտրված վարժությունը պետք է ստուգի միմիայն այդ հմտությունը: Որպեսզի թեստը հավաստի լինի, պետք է առաջադրանքների տիպերը կամ ձևաչափը ծանոթ լինի սովորողներին:

Թեման ամփոփող աշխատանքներում պետք է ներառվեն 1-ին, 2-րդ, 3-րդ և 4-րդ աստիճանի բարդության առաջադրանքներ:

1-4-րդ դասարաններում և 5-րդ դասարանի առաջին կիսամյակում թեմատիկ աշխատանքի արդյունքները ամփոփվում են **բնութագրով**, իսկ 5-րդ դասարանի 2-րդ կիսամյակից մինչև 12-րդ դասարան՝ միավորով: Թեմատիկ աշխատանքների վերլուծության արդյունքները օգտագործվում են սովորողի ուսուցման ընթացքը բարելավելու նպատակով:

Թեմատիկ աշխատանքների արդյունքների ցուցանիշները պայմանավորված են նաև գնահատման տեսակների՝ հայտորոշման և ձևավորող գնահատման արդյունավետ իրականացման ընթացքից և ճիշտ հերթագայումից:

Այդ աշխատանքները կարող են գնահատվել միավորային տարբեր սանդղակներով, բայց պաշտոնական գրանցման համար դրանք պետք է բերել 10- միավորային սանդղակի:

Թեմատիկ գրավոր աշխատանքներ կարող են համարվել նաև ռեֆերատը, էսսեն, գործնական աշխատանքը:

Ուսումնական նախագծի գնահատումը

Հանրակրթության պետական նոր չափորոշչով (ՀՊՁ) նախատեսված է, որ 7-12-րդ դասարաններում յուրաքանչյուր սովորող պետք է տարվա մեջ իրականացնի առնվազն 1 նախագիծ՝ իր ընտրած առարկայից կամ առարկաներից (ՀՊՁ, IX, 46):

Ուսումնական նախագիծը ըստ տևողության կարող է լինել կարճաժամկետ, միջնաժամկետ և երկարաժամկետ, ըստ մասնակիցների քանակի՝ անհատական և խմբային, ըստ բովանդակության՝ որևէ առարկային վերաբերող, միջառարկայական և ինտեգրված:

Ուսումնական նախագիծն իրականացվում է 3 հիմնական փուլերով՝ նախապատրաստում, ընթացք և ամփոփում:

Ներկայացնենք ուսումնական նախագծի գնահատման ընդհանուր մոտեցումները: Անհատական կամ խմբային նախագծերի դեպքում գնահատման չափանիշների մեջ առկա են որոշակի առանձնահատկություններ, որոնք պետք է հաշվի առնվեն գնահատում իրականացնելիս:

Պետք է հաշվի առնել նաև, որ ուսումնական նախագծի իրականացման ժամանակ կարևորվում են ինչպես ընթացիկ աշխատանքները, այնպես էլ արդյունքներն ու դրանց ներկայացումը: Ուստի անհրաժեշտ է ուսումնական նախագծի նախապատրաստական փուլից սկսած մինչև ամփոփում իրականացնել ձևավորող գնահատում և այդ ընթացքում կատարել համառոտ գրառումներ, ինքնագնահատում, փոխադարձ գնահատում ամփոփիչ գնահատման ժամանակ տվյալներն օգտագործելու նպատակով:

Եթե ուսումնական նախագիծը գնահատվում է 10-միավորայինից տարբեր գնահատման սանդղակով, վերջնական միավորը փոխարկվում է 10-միավորայինի:

Եթե ուսումնական նախագիծը գնահատվելու է օրինակ՝ 20-միավորային սանդղակով, կարելի է միավորները բաշխել հետևյալ սկզբունքով.

Ընթացքը – 6 միավոր, ընդ որում՝

- նախապատրաստական փուլ (թեմայի ընտրություն, նպատակի սահմանում, դերերի բաշխում՝ եթե խմբային է) - 1 միավոր
- բուն ընթացք (խնդիրների ձևակերպում, հարցերի մշակում, պլանի կազմում, ժամանակի բաշխում, ռազմավարությունների ընտրություն, աղբյուրների ուսումնասիրում, տեղեկության հավաքագրում և վերլուծություն) - 4 միավոր
- ավարտ կամ ամփոփում (վերջնական մշակում, աշխատանքի ձևավորում) - 1 միավոր

Բովանդակությունը – 8 միավոր, ընդ որում՝

- համապատասխանությունը թեմային - 3 միավոր
- ամբողջականությունը - 2 միավոր
- հիմնավորվածությունը - 2 միավոր
- գրագիտությունը - 1 միավոր

Ներկայացումը – 6 միավոր, ընդ որում՝

- ձևը/միջոցը (սահիկաշար, ֆիլմ-հոլովակ, երաժշտություն, համերգ, նկար, պաստառ, գրքույկ, բեմականացում և այլն) - 3 միավոր
- խոսքը - 3 միավոր

Ուսումնական նախագծի գնահատման համար վերոնշյալ բաղադրիչներով պետք է սանդղակ (ռուբրիկ) ստեղծել, որտեղ բաղադրիչներից յուրաքանչյուրը գնահատվում է կատարման 4 մակարդակով՝ նվազման կարգով: Յուրաքանչյուր բաղադրիչի համար որոշվում է հաղթահարված մակարդակը և նշվում համապատասխան միավորը, վերջում բոլոր միավորները գումարվում են, և ստացված վերջնական միավորը փոխարկվում է 10-միավորային սանդղակին համապատասխան միավորի և մոտարկվում:

Նախագծի գնահատման սանդղակի օրինակը տես՝ հետևյալ հղմամբ.

<https://kznakgnahatum.blogspot.com/p/7-12-1-ix-46-3-10-10-20.html>

ԳՆԱՀԱՏՄԱՆ 10 ՄԻԱՎՈՐԱՅԻՆ ՍԱՆԴՂԱԿ

Միավորային գնահատման ցանկացած ձևի կիրառմանը պետք է նախորդեն հայտորոշիչ և ձևավորող գնահատումներ:

Սովորողի կիսամյակային գնահատականը ձևավորվում է սույն կարգի 34-րդ կետում սահմանված և ուսուցչի կողմից ընտրված գնահատման ձևերից ստացած գնահատականների միջին թվաբանականով:

Սովորողի տարեկան գնահատականը ձևավորվում է կիսամյակային գնահատականների միջին թվաբանականով:

Սովորողների ուսումնառության արդյունքների գնահատման համար ներկայացված 10-միավորային սանդղակի գնահատման միավորների բնութագրիչները ընդհանրական են, որոնք հստակեցվում և տեղայնացվում են ըստ առանձին ուսումնական առարկաների և ըստ գնահատման տարբեր ձևերի:

| Միավորը | Բնութագրիչները |
|---------|--|
| 1 | Ճանաչում է ուսումնական նյութի որոշ պարզ օբյեկտներ, երևույթներ և գործողություններ: |
| 2 | Ճանաչում և տարբերակում է ուսումնական նյութի պարզ օբյեկտներ, իրականացնում է պարզագույն գործնական գործողություններ՝ ըստ օրինակի: |
| 3 | Հիշողությամբ վերարտադրում է ուսումնական նյութի փոքր մասը, իրականացնում է մտավոր և գործնական պարզ գործողություններ՝ ըստ օրինակի: |
| 4 | Հիշողությամբ վերարտադրում է ուսումնական նյութի առնվազն կեսը, օրինակ՝ նկարագրում է ուսումնասիրվող օբյեկտները բանավոր կամ գրավոր ձևերով, թվարկում է ընդհանուր և տարբերակիչ հատկանիշներն առանց մեկնաբանության, իրականացնում է մտավոր և գործնական ոչ բարդ գործողություններ՝ ըստ օրինակի: |
| 5 | Հասկանալով վերարտադրում է ուսումնական նյութի հիմնական մասը, նկարագրում է ուսումնասիրվող օբյեկտները, թվարկում է ընդհանուր և տարբերակիչ էական հատկանիշները առանց դրանց բացատրության, իրականացնում է գործնական և մտավոր գործողություններ՝ ըստ հայտնի կանոնների կամ օրինակի: |

| | |
|----|--|
| 6 | <p>Հասկանալով վերարտադրում է ուսումնական նյութի ամբողջ ծավալի հիմնական մասը, նկարագրում է ուսումնասիրվող օբյեկտները՝ կառուցվածքային կապերն ու փոխհարաբերությունները բացահայտող բացատրական տարրերով, կիրառում է գիտելիքները ծանոթ իրավիճակում ըստ օրինակի՝ բանավոր, գրավոր կամ գործնական վարժությունների, խնդիրների, առաջադրանքների կատարման միջոցով:</p> |
| 7 | <p>Հասկանալով վերարտադրում է ուսումնական նյութն ամբողջ ծավալով, կիրառում է սովորածը ծանոթ իրավիճակում, նկարագրում և բացատրում է ուսումնասիրվող օբյեկտները, հայտնաբերում և հիմնավորում է առերևույթ կապերը, փորձառությունից օրինակներ է բերում, կատարում է վարժություններ, խնդիրներ և առաջադրանքներ ծանոթ իրավիճակում՝ ցուցումների հիման վրա:</p> |
| 8 | <p>Տիրապետում է ուսումնական նյութին և կիրառում ծանոթ իրավիճակում, մանրամասն նկարագրում է ուսումնասիրության օբյեկտները, բացահայտում է էությունը, հիմնավորում և ապացուցում՝ փաստերով, եզրակացություններ է անում, ինքնուրույն կատարում է առաջադրանքները:</p> |
| 9 | <p>Լիարժեք տիրապետում է ուսումնական նյութին, կիրառում է մասամբ փոփոխված իրավիճակում: Առաջադրում է վարկածներ, ուսումնական խնդիրների լուծման նոր ճանապարհներ և ապացույցներ, ցուցաբերում է ստեղծագործական մոտեցումներ:</p> |
| 10 | <p>Լիարժեք կիրառում է ուսումնական նյութը անծանոթ իրավիճակներում: Բացահայտում է տարբեր երևույթների ներքին և արտաքին կապերը, օրինաչափությունները, առաջարկում է խնդիրների լուծման ռացիոնալ ուղիներ, կառուցում ալգորիթմներ, ցուցաբերում է ստացած արդյունքները վերլուծելու, գնահատելու հմտություններ, ցուցաբերում է ստեղծագործական հմտություններ:</p> |

Բարդության տարբեր աստիճանի առաջադրանքների բնութագրիչները

Բարդության 1-ին աստիճանի առաջադրանքներ.

Այս մակարդակի առաջադրանքները պահանջում են ճանաչում և տարբերակում, տեղեկույթի մտապահում և հիշողությամբ վերարտադրում, պարզ գործողությունների կատարում:

Արտագրելը, հաշվելը, ճանաչելը, անվանելը, օրինակով առաջնորդվելը բնորոշ են 1-ին աստիճանի բարդության առաջադրանքներին:

Բարդության 2-րդ աստիճանի առաջադրանքներ.

Այս մակարդակի առաջադրանքները պահանջում են չափորոշչային գիտելիքների բավարար իմացություն, ոչ բարդ և ծանոթ իրադրություններում դրանք կիրառելու կարողություն, ոչ բարդ հիմնավորումներ և չեն պահանջում ինքնատիպ մոտեցումներ:

Որոշում կայացնելը, համադրելը, տեղեկատվությունը վերլուծելը, ամփոփելը, կռահելը, հաշվարկելը, բացատրելը, դասակարգելը բնորոշ են 2-րդ աստիճանի բարդության առաջադրանքներին:

Բարդության 3-րդ աստիճանի առաջադրանքներ.

Բարդության այս աստիճանի առաջադրանքները կատարելիս սովորողները պետք է դրսևորեն աբստրակտ մտածողություն, կիրառեն պլանավորման և ապացուցման հմտություններ: Առաջադրանքները պահանջում են արդեն ուսումնասիրված ծրագրային նյութի բովանդակությանը վերաբերող չափորոշչային գիտելիքների հիմնավոր իմացություն, բարդ, կամ ոչ լրիվ ծանոթ իրադրություններում դրանք կիրառելու կարողություն, կողմնորոշման և կատարման համար ենթադրում են ինքնատիպ մոտեցումներ:

Կառուցելը, արտածելը, հիմնավորելը, մի քանի արժանահավատ պատասխաններ ունենալը, ընտրությունը հիմնավորելը, ոչ ստանդարտ խնդիրներ լուծելը, փորձ նախագծելը, արժևորելը բնորոշ են 3-րդ աստիճանի բարդության առաջադրանքներին:

Բարդության 4-րդ աստիճանի (առավել բարդ կամ աստղանիշով) առաջադրանքներ.

4-րդ մակարդակի բարդության առաջադրանքները պահանջում են ճանաչողական մեծ ջանքեր, չափորոշչային գիտելիքների հիմնավոր և խոր իմացություն, բարդ կամ անծանոթ իրադրություններում դրանք կիրառելու կարողություն, բազմակողմանի վերլուծություն, ստեղծագործական մոտեցում, տարբեր աղբյուրներից ստացած տեղեկությունների համադրում:

Հարցաթերթ մշակելը, հարցում անցկացնելը և արդյունքները վերլուծելը, տարբեր տեքստերը վերլուծելը, պահանջվող ոճով տեքստ շարադրելը, ստեղծագործելը կամ հարցին ստեղծագործաբար մոտենալը, արժևորելը, վարկածներ առաջադրելը բնորոշ են 4-րդ աստիճանի բարդության առաջադրանքներին:

Մտավոր ծանր և խորը խնդիրներ ունեցող սովորողների համար թեմատիկ աշխատանքներում 1-ին աստիճանի բարդության առաջադրանքները կազմելիս՝ նպատակահարմար է ուղղորդվել ըստ ԱՈՒՊ-ի սահմանած նպատակների՝ հաշվի առնելով սովորողների մտավոր զարգացման առանձնահատկությունները և կարողունակության առկա մակարդակը:

Բնութագրող գնահատում

Սովորողի ուսումնական առաջադիմության բնութագիրը կազմվում է սովորողի ուսումնական ձեռքբերումները նկարագրելու, ուսումնառության որևէ փուլի արդյունքները ամրագրելու նպատակով:

Բնութագրող գնահատումն իրականացվում է՝

1. 1-4-րդ դասարանների կիսամյակների և 5-րդ դասարանի առաջին կիսամյակի ավարտին,
2. հիմնական տարրական կրթական ծրագրի ավարտին:

Տարրական դպրոցի յուրաքանչյուր սովորողի ուսումնառության կիսամյակային արդյունքների ամփոփման նպատակով կազմվում է ուսումնական առաջադիմության բնութագրի բոլոր առարկաներից:

Առաջադիմությունն արձանագրելու համար հիմք են հանդիսանում դասարանի ուսումնական առարկաների չափորոշիչներով սահմանված վերջնարդյունքները:

Բնութագրող գնահատման չափանիշները հստակեցվում և տեղայնացվում են ըստ առանձին ուսումնական առարկաների:

Բնութագիրը ձևավորվում է էլ. հարթակում և կցվում է սովորողի անձնական գործին:

Սովորողի ուսումնական առաջադիմության բնութագրի կազմման հիմնական սկզբունքները

Սովորողի ուսումնական առաջադիմության բնութագիրը ներառում է նրա ուսումնական գործունեության արդյունքները՝ տվյալ դասարանի առարկայացանկում ընդգրկված ուսումնական բոլոր առարկաներից: Առաջադիմությունն արձանագրելու համար հիմք են հանդիսանում դասարանի ուսումնական առարկաների չափորոշիչներով սահմանված վերջնարդյունքները: Ուսուցիչն ընտրում է թեմայի վերջնարդյունքները, որի վերաբերյալ սովորողի առաջընթացը ցանկանում է որոշել և վերջնարդյունքի ցուցիչներից ընտրում է սովորողի առաջընթացը ամենից լավ բնութագրող ցուցիչները: Սովորողի առաջընթացի վերլուծության արդյունքում ուսուցիչը որոշում է առաջընթացի բարելավման ուղենիշները: Ուղենիշներին համապատասխան ուսուցիչը որոշում է դրանց իրականացմանն ուղղված գործողությունները:

Յուրաքանչյուր աղյուսակի առաջին սյունակում տրված են տվյալ առարկայի ուսումնական ծրագրով սահմանված հիմնական հասկացություններն ու թեմաները (ԵՇԱ, Շախմատ, Մաթեմատիկա, Մայրենի և այլն), իսկ աղյուսակի առաջին տողում ներկայացված են Ա, Բ, Գ, Դ, Ե սյունակները՝ ցույց տալով առարկայական չափորոշչով սահմանված վերջնարդյունքների կատարման աստիճանը տվյալ կիսամյակի համար՝ նվազման կարգով:

Ամեն առարկայի ուսուցիչ կարող է կազմել յուրաքանչյուր սովորողի բնութագիրը՝ հաշվի առնելով հետևյալ ցուցումները.

Ցուցումներ բնութագրերի կազմման վերաբերյալ

Ներկայացված աղյուսակների Ա սյունակում ներկայացված են առարկայի ուսուցանվող թեմաների վերջնարդյունքները՝ ձևակերպված բնութագրի ձևով: Սյունակը ներկայացնում է վերջնարդյունքների ապահովման առավելագույն աստիճանը: Հաջորդ սյունակները ներկայացնում են յուրաքանչյուր վերջնարդյունքի ապահովման տարբեր աստիճանները:

նվազման կարգով: Վերջին՝ Ե սյունակում ներկայացված է վերջնարդյունքի ապահովման նվազագույն աստիճանը:

Ուսուցիչը կարող է յուրաքանչյուր սյունակի բնութագրերին ծանոթանալով՝ ընտրել յուրաքանչյուր երեխայի համար այն ձևակերպումները, որոնք առավելապես համապատասխանում են նրա ուսումնառության արդյունքներին կիսամյակի ավարտին: Այս աշխատանքը կատարելիս ուսուցիչը պետք է հիմնվի ողջ կիսամյակի ընթացքում կիրառած ձևավորող գնահատման արդյունքների (ստուգաթերթերի, համառոտ գրառումների, ռուբրիկների, դիտարկումների, հայտորոշիչ և ամփոփիչ առաջադրանքների և այլ գործիքների պարբերական կիրառման վերլուծությունների վրա):

Բնութագրերը կարող են կազմվել տարբեր սյունակների բնութագրումներից ընտրված նկարագրություններից՝ ամբողջացնելով սովորողի ամփոփ բնութագիրը տվյալ առարկայից: Նույն տողից միայն մեկ բնութագրիչ կարող է ներառվել կոնկրետ սովորողի բնութագրի մեջ, քանի որ յուրաքանչյուր տողում նկարագրված են նույն վերջնարդյունքի ապահովման տարբեր աստիճանները: Չի բացառվում, որ սյունակներից մեկի բնութագրումները լիովին համընկնեն կոնկրետ սովորողի առաջադիմության արդյունքներին, սակայն առավել հաճախ դա կլինի տարբեր սյունակներից առանձնացված բնութագրիչներից կազմված խճանկար:

| Հիմնական հասկացույթ յուն | Թեմա | Ա (Թեմայի վերջնարդյո ւնք) | Բ | Գ | Դ | Ե |
|--------------------------------|------|--|---|---|---|---|
| | | | | | | |
| | | | | | | |

Բնութագրերի օրինակները տես՝ <https://kznakgnahatum.blogspot.com/>